

Bakal pelabur harus awasi

BAKAL-bakal pelabur harus mengawasi kempen yang sedang dijalankan hendak menakutkan mereka daripada melabur di negara-negara membangun seperti Malaysia dan lain-lain lagi.

Pilihanraya di Malaysia baru selesai tetapi masih ada ramalan tentang tidak ada kestabilan dan kemungkinan berlakunya kekacauan yang menunjukkan seolah-olah pihak-pihak yang membuat siaran seperti itu memang ingin hendak melihat kekacauan berlaku untuk membuktikan kebenaran ramalan masing-masing.

Pada hal apa yang berlaku adalah sebaliknya, dengan Kerajaan Pusat cukup stabil dan kerajaan-kerajaan negeri kukuh tidak dapat digoncang.

Majalah-majalah asing yang menyiarkan rencana-rencana ramalan mengenai keadaan di Malaysia pada masa ini dan pada masa akan datang cepat sangat memberi gambaran tidak baik mengenai Malaysia. Apakah tujuannya tidaklah diketahui tetapi nyata sekali siaran-siaran itu menunjukkan sudah kehilangan modal hendak menulis perkara-perkara yang benar, jadi yang tinggal ialah ramalan-ramalan sahaja.

Tetapi ramalan-ramalan bukan tidak boleh dibuat asalkan berasaskan kebenaran dan sebaliknya bukan apa yang ingin dilihat oleh yang membuat ramalan-ramalan itu.

Di Malaysia, ramalan-ramalan boleh dibuat berasaskan keputusan pilihanraya yang baru lalu dengan melihat kepada keadaan menyeluruh, bukan membesar-besarkan yang kecil. Kalau yang kecil-kecil itu hendak dijadikan contoh, maka tidak ada negara yang boleh terlepas dari kekacauan.

Malaysia telah memperlihatkan kepada dunia bahawa ia adalah di antara negara yang paling stabil, baik di segi politik mahu pun di segi ekonomi. Kerajaannya adalah di antara kerajaan yang paling kuat dan kukuh, berkali-kali diberi mandat oleh rakyat.

Sepatutnya keadaan seperti itu diberi segala galakan dan sokongan kerana kestabilan di satu-satu tempat boleh menolong membawa kestabilan di sekelilingnya, sekiranya belum ada.

Timbalan Perdana Menteri, Datuk Seri Dr. Mahathir Mohamed, tentulah tidak dapat berkata lain daripada mensifatkan siaran yang bukanbukan oleh majalah-majalah internasional itu sebagai satu "kempen jahat" hendak menakut-nakutkan bakal-bakal pelabur dari datang ke Malaysia.

Tidak ternampak Malaysia dan negara-negara membangun yang lain dapat mengancam kedudukan negara-negara perindustrian sekarang tetapi inipun telah dijadikan bahan untuk menakut-nakutkan bakal-bakal pelabur. Mujur juga ramai pelabur tidak memandang berat siaran-siaran seumpama itu. Mereka lebih mengetahui keadaan sebenarnya.

Bahan asal dari Arkib

Negara Malaysia